



## Samewirkende Limburgse Vastelaovesvereniging

### Versjlaag uëver 't verenigingsjoar 01-04-2016 t/m 31-03-2017

---

#### Doelsjtëlling

De doelsjtëlling van de SLV is 't in sjtandj hawte en bevordere van de vastelaovend es uuting van laevende volkscultuur en folklore in Limburg en daodoor ein biedraag levere aan 't cultureel en maatsjappelik laeve in ós provincie; dit mit respèk veur de eigenheid van de door de lidvereniging plaatsjelijk beoefende Vastelaovend.

Dit wilt de SLV bereike door 't bevordere van de óngerlinge samewirking, 't versjtevige van de óngerligkende bandj, 't oetreike van óngersjeijinge, 't samewirke mit anger organisaties en 't optraeje es euverkoepelend orgaan.

#### Lidvereniging

De Samewirkende Limburgse Vastelaovesvereniging waere gevormd door 17 vereniging, de grote, traditieke sjtadvastelaovesvereniging van Limburg. Dees vereniging voldoon aan de criteria zowie die zeen vasgelag in de sjtatute. Dees 17 vereniging zeen: de Aanhawwersj oet Meersje, de Baeker Pottentaote oet Baek, 't Bombakkes oet Gennep, Burgerlust oet Egelse, 't C.C.H. oet Gebrook, de Flaarisse oet Gelaen, V.V.G. Jocus oet Venlo, de Kirchraötsjer Vasteloavends Verain oet Kirkrao, de Marotte oet Zittert, de Mirlitophile oet Valkeberg, V.G. D'n Oeles oet Tegele, de Piëlhaas oet Venroj, de Rogstakers oet Weert, de Steinder Bök oet Stein, de Tempeleers oet Mestreech, d'n Uul oet Remunj en de Winkbülle oet Heële.

Besjermheer van de SLV is de gouverneur van ós Provincie, d'n heer Theo Bovens.

In 't aafgeloupe seizoen vierde tweë vereniging hun jubileum: de Pottentaote oet Baek vierde hun 12 x 11 jädig besjtaon en de Aanhawwesj oet Meersje hun 6 x 11 jaar.

De tweë vereniging höbbe deze verjaordige mit versjillende activiteite, wo ónger recepties, in hun eige gemeinsjap gevierd.

#### Besjtuur SLV

In 't aafgeloupe verenigingsjaar haet de SLV aafsjeid genómme van sikkertaris Tenny Tonen, 2<sup>de</sup> sjriever Peter Hilkens en Ad Jongen es besjtuurslid. Veer danke ze veur hunne inzet veur de Limburgse vastelaovend. Daomit besjtóng 't besjtuur dus nog mèr oet Raymond Vlecken: president/veurzitter, Frits Dirks: sjatmeister, Paul Leenen, ceremoniaris en sikkertaris a.i. Mit ongersjteuning van de kemmissie 'Nuuje Besjtuursleje', besjtaonde oet Ton Toussaint, Paul Frissen en Eric Voncken zeen oppe decembervergadering 3 nuuje besjtuursleje veurgesjteld: Bart Faassen vanoet D'n Oeles, Paul Göttgens vanoet de Winkbülle en Max Ruiters vanoet de KVV. Paul Göttgens zal 't sikkertariaat gaon oppakke. In de decembervergadering zint Tenny Toonen en Peter Hilkens óp vüerdrach va de lidvereniging benumd tot leëre Besjtuurslede.

't Besjtuur vergaderde maonjeliks mit oetzunjering van de vastelaovestied en de maondj juli.

Naevebie is d'r door individuele lede op versjeije terreine vergaderd: veurbereiding van 't Jubileum SLV 5 x 11 jaar in 2017, euverlèk mit de commissie die de Gulden Humorkandidaat veurdreeg en mit de organisatie van de oetreiking van dees hoog óngersjeijing, De Steinder Bök.

Op verzeuk van de lidvereniging is besjlaote de oetreiking van de Gouden Narrenkap auch te laote roulere. Kommend jaar zal de oetreiking van de Gouden Narrenkap plaatsjvenje in Tegele bie D'n Oeles.



### ***Óngersjeijing***

Op veurdrach van de lidverenigingen haet 't besjtuur 't aafgeloupe jaor 5 persone ongersjeije mit de Orde van Verdeenste. Auch woort 5 maal de Zilveren Buut, ein óngersjeijing veur artieste die vööl höbbe beteikend veur ein lidvereniging, oetgereik.

Biezunjer vermeldenswaard is dat Vorst Jan Stroek van de Rogstaekers bie zien aafsied woort beneump es Erelid van de SLV veur zien jaorelange inzat es President van dees vereniging. In dees hoedanigheid waor hae ouch ummer present es aafgevaardigde oppe ledevergadering. Auch haet Bart Faassen nao zien 33 jöörig lidmaatsjap van D'n Oeles dees biezunjere titel maoge ontvange.

### ***NEG***

't Congres van de Europese Bóndj woort dit jaor gehawte in 't Östenriekse Bad Hall. Dao is flink vergaderd en mit vööl plezeer trökgekeke op 't bezoek aan 't Knoevelement aafgeloupe jaor en 't Gilde van de Blauw Sjuut.

De SLV zal same mit de BCL de organisatie veur de 'Tagung' in september 2017 verzörge. In dat kader zeen diverse bieekomste gewaes mit 't besjtuur van SLV en BCL.

### ***Externe contacte***

't Aafgeloupe jaor haet 't besjtuur versjillende evenemente en aktiviteite bezoch op oetneudiging van diverse organisaties: de äöpening van 't vastelaovesseizoen door de SjengKraftKompanei oppe Vriethof, de finales van 't LVK en ouch oppe buutefinale waor ein aafvaardiging van 't besjtuur present.

De gouw relatie mit ós provinciebesjtuur is wiejer óngerhawte bie de nuujaorsreceptie. Ouch bie de presentatie van de 12<sup>de</sup> vastelaovesposter in 't Schutterijmuseum in Steyl waor een delegatie d'rbie: óntwerper Sjer Jacobs oet Tegele maakde Limburg blie mit ein lachend kenjergezich.

In Belgisch Limburg, in Bree, waore veer te gas bie de Limburgse Daag van LIVEKE. Ozze laureaat veur de Gulden Humnor in 2016, reikte dao, in aanwezigheid van hunne Besjhermheer Gouverneur Herman Reynders en Deputé Jean-Paul Peuskens de belangriekste Limburgse carnavalsondersjheid "de Bronsgroene Leeuw" oet aan Ben Lambrechts, Algemeen Directeur van scholenkoepel PXL. Zien frisse, eigenninnige en verrassend meneer om 't ongerwies te promote en zoa vööl jongere wit te enthousiasmeren veur 't onderwies in 't algemeen waor hie veur de motivatie.

### ***Gulden Humor***

#### ***Laureaat***

Op verrassende meneer en mit ein smoes veur ein gezamenlik euverlegk, woort 't besjtuur LIVEKE in Maaseik verras mit de boodsjaap dat zie in 2016 de Gulden Humor zoude ontvange. Verras en biezunjer greuetsj höbbe veer de veurbereidinge same mit de organiserende vereniging De Steinder Bök opgepak. LIVEKE veel de eer te beurt veur hunne inzet om de Limburgse vereniginge te laote samewirke en d'r euver te wake dat bie haer vereniginge de Neder-Rijnlandse tradities gevolg waere en bewaard blieve. Daomit levert LIVEKE op ein biezunjere meneer ein biedrage om de levensblieheid en humor te brenge en vööle luuj mitein te verbenje, zowaal in Belgisch es in Nederlands Limburg.

#### ***D'n feesdaag***

De oetreiking van de Gulden Humor waor dit jaor op zaoterdig 26 november bie de Steinder Bök in Stein. Vertegenwoordigers van de 17 lidvereniginge van de SLV, 't besjtuur van de SLV, Laureaat LIVEKE en genodigde woorte vorstelijk óntvange in 't Gemeintehoes van Stein. Burgemeister Marion Leurs-Mordang waor aafwezig, mer leet zich vervange door heur alter ego: de Barones van Stein. Daonao woort de Laureaat in stijl nao MFC de Grous verveurt in de gouwe koets. De gouverneurs van beide Limburgen, diverse burgemeisters en gedeputeerden van de provincie waor ere-gast bie de Ceremonie Protocollair wo LIVEKE blie verras woort mit dees hoage ongersjeijing. Mit ein geweldige feësaovend in de sporthal Merode woort dees Gulden Humor door de Steinder Bök aafgesjlaote.



## **Aafsjeid**

Veer höbbe in 't uverenigingsjaor 2016-2017 aafsjeid genómme van ere-lid Pie Steffens. Pie waor jaore aafgevaardigde van de SLV veur de Tempeleers oet Mestreech, wo hae ruum 50 jaor aktief waor veur de vastelaovend.

Auch naome veer aafsjeid van Peter Vellinga. Peter vormde same mit Piet Boonstra bienao 40 jaor 't Duo Oetgesjlaope, dat in 1990 de Gouden Narrenkap kreeg. Recent prizzenteerde Peter zien cd 'De angere kant', dae hae same mit Ivo Rosbeek opnaom.

## **Sjponsore**

't Aafgeloupe jaor is d'r door mit name oze sjatmeister heel hël gewirk aan oetbreijing van 't aantal sjponsore en, daomit, ein solide finansjeel basis. Zónger de finansjel sjeun van sjponsore is 't neit mee muigelik evenemènte te organiseiere. Op gepaste meneer woorte os sjponsore bedank mit ein taart van bekkerie Frits Mennen. Kemit, dank veur 't vernuje van ózze website, Brand beierbrouwerie, Wiertz personeelsdeinste, Xymio evenemèntetechniek, Boels Rental en Thetru bedank dat geer de aktiviteite van de SLV muigelik hób gemaak.

## **Es besjloet**

't Aafgeloupe jaor is d'r door 't besjuur vööl geïnvesteierd óm de aoep gevalle besjuursplekke in te völle. Nao 't aafsjeid van Tenny Tonen en Peter Hilkens oppe decembervergadering, zeen Bart Faassen en Paul Göttgens gesjart in janewarie. Max Ruiters geit 't kommende seizoen aansjlete. Daomit is 't besjuur weer op sjterkte en zal same mit de lidvereniging zich verheuge op haer 5 x 11 jaorig jubileum kommend jaor. Same mit de lidvereniging blieve veer ós inzètte óm de Limburgse vastelaovend in sjtandj te hawte es cultureel erfgoed van dees provincie.

*Heële en Gelaen, april 2017*

Paul Göttgens en Paul Leenen

Geakkoordeerd te Venlo op maondig 15 mei 2017

Raymond Vlecken, *president*

Paul Göttgens, *sikkertaris*

